



a cura di Ezio Baglini

CARLA CAVELLI TRAVERSO, *Corpus delle uniformi civili*, De Luca Editore, 2009, pp. 104.

Pin de ilustraçion e ben documentou da 25 anni de catalogaçion da parte do Serviçio Coltua da Region, o libro o describe e divize portæ da-i fonçionai de Corte e do Stato, into periodo XVIII-XX secolo. Comme e divize militari, anche quelle civili ean sogette a 'na severa e precisa normativa, de moddo che se poêse individoâ o funçionario ch'o-a portava, a categoria d'apartenensa, o graddo, a fonçion e a responsabiltae. A fantaxia a no gh'à limite.

JENNIFER DELLA ROCCA, *Aÿron Xavi - Stella con meta*, S.E.S. Società Editrice Sampierdarenese, Genova, 2009, pp. 224

Doppo o primmo libro, intitolou *Aÿron Xavi Destinazione C1122* e stanpou do 2008, l'è sciortio, pe-i tipi da SES de San Pê d'Ænn-a e pe man de 'na figgetta de disétt'anni, o segundo volume de aventûe into spaçio galatico. Con fervida fantaxia, se incroxa scitoaçion inprevedibili, sentimenti boin mescciae con quelli grammi, mondi nêuvi e diversci, inte 'na stôia bonn-a a tegnî adescia l'atençion fin a-a fin do libro.

MAURIZIO SENTIERI, *Banca delle tradizioni*, De Ferrari Editore, Genova, 2009, pp.96.

Libro de gastronomia, con sotto titolo "riçette (no solo liguri e savoi de vitta". Ma o no l'è 'n senplice libro de riçette; ma a testimoniansa pe 'n davei arecugeita into teritoio del'antiga Republica de Zena, da coltua alimentare "in via de estinçion". Defæti e riçette prezentæ, son o fruto de 'na riçerca – duâ dex'anni e coordinâ da l'Aotô, unica a livello nazionale – e rapresentan a rescoverta e valorizaçion di diversci uzi alimentari.

UMBERTO GUGLIOTTA, *C'era una volta il Costa del Sol, fra cronaca e fantasia*, De Ferrari Editore, Genova, Collana Sestante, 2009, pp.96.

Do 1994, a Sann-a, un incendio dolozo o l'à destruto o brigantin 'Costa do Sol' arivou in avaria vint'anni primma: cosci l'è finio a seu misterioza stôia. O stupendo veliero e o seu capitano an fæto nasce contrastanti sentimenti da intrâ into mito de stôie do mâ, donde veitæ e fantaxia se mesccian insemme. L'Aotô, savoneize d'adoçion, doppo meticolose riçerche, analixi de documenti e giornali de l'epoca, o l'à ricostruio a stôia do veliero, in moddo da fornî a-o letô de notiçie ciù vere e provæ.

AA.VV. *Poggio e San Bernardo di Favaro storia di due borghi e di una chiesa*, Edizioni Bogliasco, 2009, p.208

Pier Luigi Gardella, premio De Martini 2009, e o Centro Studi Storie di Jeri, an coordinou a redaçion do libro ch'o tratta de doi fraçion de d'ato a Bogliasco e, comme dixe o titolo, co-ina sola gêxa. Sta cösa a l'è o spégio de l'unitæ di abitanti, ch'a dûa da ciù de quattroçent'anni. Stôia e toponomastega, personn-e, tradiçion e sagre, soçietæ sportive e serviççi sociali descrîti into libro, dimostran a capaçitæ de queste comunitæ a organizase e a rendise parte vitale no solo da stôia locale ma asci de quella da Rivea.

MIRCO ORIATI, ROSSANA RIZZUTO, *A volo di gabbiano, storia e amore tra Genova e Palermo*, S.E.S. Società Editrice Sampierdarenese, 2010, pp. 160.

'Na cöbia de inamoæ, o màscio zenêize e a figgia de Palèrmo, into parlâse e into scrovî e seu çitæ dôve sôn nasciûi, s'acòrzan di profòndi ligàmmi che uniscian a stôia e a vitta di doi capolêghi.

A cösa òriginâle do libro a l'è quella d'avêi introdùto – a-o prinçipio de ògni capitolo – 'na dôce naraçion da pròpia scovèrta de cöbia, segoia da-a constataçion stòrica de 'n incòntro za visciûo tra e dôe çitæ, no sôlo pe-i antîghi tràfeghi mercantîli ma anche perché i çitadin che se sôn fransferîi da 'n pòsto a l'âtro se vèuan bèn. S'intrèssa cosci a stôia di doi galânti con quella de dôe çitæ e di seu monumènti. Sta scovèrta chi a stupiâ asci i zenèixi, che no son abitoæ a lêze a pròpia stôia contâ da 'n âtro pònto de vista.

MARCO MASSA, *Mussolini e la sua Liguria*, De Ferrari Editore, 2009, pp. 123

O libro o cóna a crònaca de dôe vixite do ditatô in Ligùria e di rapòrti ch'o l'à tegnûo co-a nòstra tàra. Drénto se gh'atrèuva 'na Zêna d'âtri ténpi tra sperânse, òpere pùbliche e scène do regimme. E se gh'atrèuva a nòstra Asociçion asci. Za savéimo, da-i documènti che gh'émmo in Sêde, che dôppo pòchi anni da-a nâscita, i sòcci da Compagna êan ciù de trentamilla. L'è ciæo che i ténpi càngian: l'ingonbrânte presènsa de Rómma (e di români), l'imigraçion do dôppo goæra e a stôia ciù recente an ægoù l'amò e l'interèsse pe Zêna e-e seu tradiçion. Ma, còmm'o scrîve o Prescidènte un primma pàgina, chi consèrva quèsto sentimento antîgo, no dêve molâ, ma o se dêve dà da fâ pe fâ tornâ a Ligùria a l'òno do móndo.

